

四庫全書

史部

欽定四庫全書

平定準噶爾方略正編卷四十七

乾隆二十二年冬十二月辛酉

諭酌派兵丁護送軍營馬匹

上諭軍機大臣曰據吳達善豆斌奏稱護送軍營馬
八千匹將所派兵丁編隊行走等語所辦甚是其
吉林索倫察哈爾等閒散餘丁俱酌量賞給昨成
衮扎布等奏請增馬二千匹已諭黃廷桂趲送并

留富紹照料計此旨到時巴圖濟爾噶爾等早已
起程著傳諭吳達善等作速行文巴圖濟爾噶爾
等將所領兵五百名內挑選索倫蒙古兵一百名
交富紹帶回巴里坤護送續進馬匹現在將軍等
撤兵烏魯木齊等處過冬其地距巴里坤千餘里
如相去不遠則巴圖濟爾噶爾兵已足用或尚不
足即於巴里坤添派綠旗兵丁護送若將軍處迎
馬兵丁到來即遣回綠旗兵在富紹隊內行走亦

可今吳達善等已行文軍營迎取馬匹并著傳諭成衮扎布等令其速遣至前項馬匹交收後所派綠旗兵不必回巴里坤或入進勦回部隊內或留於屯田處効力將軍等酌量辦理

命戶部侍郎阿里衮回巴里坤辦事

上諭軍機大臣曰昨據阿里衮奏稱同額敏和卓進勦沙拉斯瑪呼斯等賊衆距滿福祇隔三站即速為接應等語此時曾否會合一處勦滅賊人但巴

里坤辦事甚屬緊要雖有豆斌德舒仍須大臣駐
劄阿里袞未奉朕旨自必帶兵前進著傳諭阿里
袞若沙拉斯瑪呼斯事竣即回巴里坤辦事

壬戌

諭散秩大臣和碩齊等駐兵勦賊事宜

上諭軍機大臣曰前命和碩齊護送哈薩克使臣途
中遇阿睦爾撒納及大隊賊衆即行擒勦并著唐
喀祿帶兵策應現在伊等若未與賊人相遇於護

送來使歸伊游牧後即駐劄額爾齊斯附近明歲西路之兵於正月下旬自烏魯木齊起程三月中旬可至沙喇壩勒若和碩齊唐喀祿往返道途必至遲悞今即就近駐劄既可辦理逋逃賊衆亦得以休息馬力著駐劄科卜多大臣接濟伊等行糧俱速行傳諭知之又

諭曰據審訊賊黨烏勒木濟供稱去冬阿睦爾撒納在烏梁海時都爾伯特之孟克博羅特曾相隨同

去後又往納木奇游牧等語從前愛隆阿勦殺納木奇賊衆之時未有孟克博羅特名目或竄入額爾齊斯等處藏匿亦未可定著和碩齊等留心查拏解送來京

次
叅贊大臣富德疏奏辦理撤兵及勦賊官兵功

富德奏言臣准兆惠咨文奉到

諭旨以阿睦爾撒納逃入俄羅斯順德訥等不必在

彼守候即應遵

旨撤回因遣往哈薩克之額爾克沙喇努三等尚未
回營暫令留駐臣於十月二十五日令鄂博什
帶兵二百名前往額林哈畢爾噶沿途搜勦嗎
哈沁與將軍會合昨據往哈薩克貿易人等帶
來額爾克沙喇等書札聞阿布賚游牧移向巴
顏鄂拉又聞巴圖爾烏巴什出痘身死屬實再
臣等聞烏梁海安濟格斯奎與俄羅斯素有讐

隙派出署防禦達色等於本月二十四日至布
克圖爾瑪安濟等十餘戶迎戰達色追射安濟
遇石傷足前鋒卓丹即奮力前進將安濟生擒
其格斯奎亦被擒獲計勦殺烏梁海三百餘戶
獎賞藍翎烏勒德克陣亡三等侍衛喀勒扎卜
等帶傷又於庫克郭勒地方遇郭勒卓輝之烏
梁海等二十餘人放鎗迎敵我兵墜馬者數人
有寧古塔披甲人英德訥黑龍江打牲達呼里

達三保奮勇救出盡勦賊衆又在臣隊前隊行走奮勉之三等待衛畢拉爾海吉林署協領扎庫齊索倫署協領金濟噶爾阿第木保察哈爾署協領喇嘛扎卜藍領侍衛達桑阿等俱出衆効力謹將伊等功次列單恭呈

御覽奏入得

旨富德所奏前隊効力之畢拉爾海授為二等待衛扎庫齊金濟噶爾阿第木保俱授為協領喇嘛扎

卜授為頭等侍衛達桑阿授為三等侍衛擒獲烏
梁海安濟格斯奎之達色卓丹俱授為藍領侍衛
勒殺烏梁海之英德訥達三保俱授為三等侍衛
其餘奮勉効力及陣亡得傷官兵俟造冊到日該
部照例議叙議卹

諭巴里坤辦事巡撫吳達善分別辦理軍營効力之
厄魯特等各事宜

上諭軍機大臣曰富德所奏軍營効力之厄魯特普

爾普賽音庫本烏穆什巴圖濟爾噶爾達瓦等五
人熟悉回部道路語言著同伊等妻子送至巴里
坤給與口糧以備進兵時調遣其瑞達喇等十人
著分賞官兵又巴爾達穆特得木齊袞楚克扎卜
効力軍營已授為二等侍衛與同行之瑪勒占等
十人送至巴里坤時著派員解送來京可傳諭吳
達善等遵照辦理

戶部侍郎阿里衮等疏奏都統滿福被害信息

阿里衮等奏言臣等聞都統滿福於十一月初六日過肯色嶺追勦沙拉斯瑪呼斯臣等輕騎前進於十三日遇滿福帶往之吉林佐領麻色等官兵一百七十餘人陸續步回急問情由始知滿福帶領官兵二百七十餘人於初七日遇乘馬賊人百餘因直前攻擊賊俱敗走初九日滿福得臣等來信即欲駐候同行隨據將軍處遣來厄魯特七名有沙拉斯得木齊敦多克哈

什哈瑪呼斯得木齊敦多克車凌呈驗印文令
將賊首擒拏招降餘衆並言路徑險阻須先遣
數人同往招降初十日滿福所遣索倫兵勒克
圖回稟云同厄魯特二名呈送羊隻現在敦多
克哈什哈已將賊首擒拏等候並派兵修路迎
接十一日滿福行至哈喇和落地方見厄魯特
等修路山徑尤險樹林甚密下有深溝滿福懷
疑急令前隊收回忽賊衆千餘自林內突出截

斷我兵戰至日暮賊衆始回麻色等聚集兵丁
探問滿福信息有吉林披甲人平泰告知賊衆
圍急滿福厲聲大呼奮力射賊忽數賊衝入滿
福被鎗刺墜溝中麻色即令平泰前引覓路下
溝見一帶傷厄魯特云此溝甚深並無可下之
處又詢以賊人游牧據云敦多克哈什哈豫通
信息將戶口於十月十五日移過達朗嶺留兵
守候交戰今已將海都河橋渡嶺路俱行毀壞

往投巴圖爾烏巴什游牧等語麻色等過嶺沿
河覓路不得因步行回報臣等查麻色等官兵
除得傷之外其餘軍器俱盡因給以口糧暫令
撤回臣等即帶兵尋取滿福身屍追勦賊衆奏
入

上諭軍機大臣曰據阿里衮等奏稱滿福追勦沙拉
斯瑪呼斯因叛賊敦多克哈什哈等以迎降誘入
伏中被鎗陣亡等語滿福雖為賊所愚究屬捐軀

盡節著照陣亡之例議卹其隨從奮勉官兵及陣亡得傷人等即造冊送部照例分別敘卹至阿里衮此行係接應滿福今所奏初未自行引咎及憤恨賊人豈專為取滿福信息耶現在時屆冬寒兵力亦乏伊等奉到此旨如不能竣事即可撤兵哈寧阿亦不必前行俟來年大兵進勦額敏和卓就近往游牧休息阿里衮即回巴里坤辦事併傳諭駐劄烏魯木齊將軍大臣等知之又

諭曰滿福追勦沙拉斯瑪呼斯被叛賊敦多克哈什
哈敦多克車凌等誘害伊等効力軍營為成衮扎
布等信用遣往招降乃與賊衆相通情尤可惡來
年將軍大臣等進兵務將二賊嚴行查拏送京看
來厄魯特等真不可信即三都克亦當留心察看
倘有可疑或即於軍營正法或派員解送來京不
可致令逃脫

癸亥

命山西巡撫塔永寧購辦軍需駝隻

上諭軍機大臣曰據黃廷桂奏稱現在軍營需用駝隻業經行文晉省購買三千隻陸續解送等語著傳諭塔永寧即照該督所奏選委妥員分路購買務擇臚壯口輕者隨得隨解從前明德採辦時所定價值未免減少此次購買倘有不敷即酌量加增亦無不可總期於軍行無悞仍遴選妥員加意照料解送

乙丑

申諭散秩大臣和碩齊等駐兵防賊事宜

上諭軍機大臣曰昨諭和碩齊唐喀祿於送哈薩克使臣之便帶兵駐劄額爾齊斯附近截拏逃賊以候阿睦爾撒納信息今據策布登扎布奏稱來年大兵前進巴圖爾烏巴什等賊若欲逃入俄羅斯必經由塔爾巴噶台愛呼斯等語著傳諭和碩齊等於額爾齊斯等處酌量留兵堵截伊等即帶兵

至塔爾巴噶台愛呼斯察看賊人來路安設卡倫
勤為瞭望如有逃賊即行勦滅不可致令偷越仍
將駐兵處所酌定具奏

授副將軍喀爾喀郡王策布登扎布帶往軍營之藍
翎侍衛拜達爾為三等侍衛虛銜藍翎赫倫泰
莫寧察為藍翎侍衛司鞍佛爾賽賞給虛銜藍
翎仍賞銀各五十兩員外郎色楞賞銀一百兩

丙寅

諭添派屯田兵丁備勦回部

上諭軍機大臣曰來年進勦沙喇肇勒賊衆派兵四千名由魯克察克往辦回部派兵二千名計兵已六千自屬足用但魯克察克二千兵後再得應援之兵更為有益所有烏魯木齊等處屯田兵丁雖耕作時人力宜多播種後即可酌減著傳諭黃廷桂雅爾哈善等將各處屯田兵約計若干留十分之三四守候成熟其餘仍隨同進兵若可得三千

則合之軍營幾及萬人即可號稱數萬愈覺聲勢
雄壯如屯田兵不敷抽調即於綠旗兵內添派綠
旗兵頗善步行祇須每人給馬一匹令隨同雅爾
哈善暫駐魯克察克之兵進勦回部其酌量抽派
之處伊等行文酌議一面辦理一面奏聞併傳諭
兆惠策布登扎布知之又

諭曰前因成衮扎布等以屯田事宜奏請已命雅爾
哈善等相度可耕地畝支給籽種出派兵丁今又

於屯田兵內抽調三千續進可傳諭黃廷桂雅爾
哈善所派屯田兵丁務與地畝相稱既使可耕之
土不致荒閒亦於進勦有益其悉心經理條晰具
奏

丁卯

諭軍營將軍大臣籌辦屯田市馬各事宜

上諭軍機大臣曰昨命黃廷桂雅爾哈善查勘屯田
處所廣為播種勿致荒閒添派兵丁以資耕作來

年我兵進勦自應立奏膚功即使未盡剪除必蓄
積有餘始可次第辦理可傳諭兆惠富德等留心
經畫務使地無遺利至哈薩克約於來年貿易所
到馬匹亦須多為購買馬蕃糧足興樂飽騰於軍
務甚有裨益此二事宜與黃廷桂雅爾哈善等同
心商辦再努三從哈薩克初回自悉彼處情形軍
營現亦無事著來京以備詢問

命順天府南路同知范清曠調補甘肅洮州同知承

辦哈薩克貿易事務

已已

諭添派綠旗兵丁及進勦回部事宜

上諭軍機大臣曰昨策布登扎布奏請添派綠旗兵
丁接續進勦已命黃廷桂等於屯田兵內酌量抽
調三千名矣今阿里衮額敏和卓奏稱領兵至哈
喇和落捉生詢問知敦多克哈什哈等同沙拉斯
得木齊都噶爾瑪呼斯得木齊根色等帶領游牧

由庫車向葉爾羌和闐逃去已遣人從庫車間道
引兵堵截等語看來辦理回部一事伊等既知覺
豫備則兵勢更須壯盛可傳諭黃廷桂於前抽調
兵丁外添派綠旗兵五千名即在甘肅等標營內
調撥於來年春盡夏初前進其糧餉馬匹俱應速
為料理帶領前後綠旗兵八千名著派馬得勝丑
達再派總兵一員同領仍曉示官兵務須顧惜顏
面奮勉効力併傳諭軍營將軍大臣等知之又

諭曰據阿里袞額敏和卓奏稱領兵至哈喇和落知
沙拉斯瑪呼斯游牧已逃往庫車等處現在遣熟
識路徑之人取近堵截頗合機宜伊等遇賊游牧
收其馬駝牲隻固可以增兵力但與賊衆相持則
帶兵尚覺其少朕心頗為廛念阿里袞等惟相機
行止如勢難猝辦即可撤兵倘額敏和卓確見庫
車可取亦不必遽回游牧

諭將軍大臣等查詢脫出兵丁情節

上諭軍機大臣曰據吳達善等奏稱由臺站呈報隨
滿福進勦之索倫署領催遜坦等因滿福被害伊
等力戰不支至日暮時脫出已送往軍營并於吐
魯番派兵二百名接應阿里衮等語所辦尚是但
遜坦等之言未足深信若果力戰得脫其情自有
可矜如臨敵即逃豈可顛預不問蓋大臣勦賊所
恃官兵擁護若大臣方奮勇向前而官兵乃棄將
先遁以致勢孤被害尤為軍法所不宥著傳諭兆

惠富德阿里袞等將脫出人等加意體訪詢問有
無此等情節查明具奏

賊黨烏勒木濟正法

癸酉

恩授新附烏梁海宰桑等官職並定入貢賞賚之例
上諭軍機大臣曰據納穆扎爾奏稱阿勒坦淖爾之
烏梁海宰桑特勒伯克扎爾納克等新經歸附請
照察達克等之例於來年入貢等語烏梁海等輸

誠入貢甚屬可嘉宰桑特勒伯克扎爾納克授為
三品總管賞戴孔雀翎得木齊奇爾吉斯敦多克
策楞巴哈雅克俱授為佐領賞戴藍翎准於來年
入貢至伊等貢物數目已較舊時裁減仍加以賞
賜嗣後每貢貂鼠十個賞緞一端灰鼠二十個賞
布一尺察達克等八貢亦照此例納穆扎爾即傳
諭車木楚克扎布等明白宣示俾邊隅臣僕咸知
德意

命議叙叅贊大臣富德奏報之勦賊護糧各官兵
上諭軍機大臣曰據富德奏稱過鄂爾和楚克山至
摩和爾岱地方有賊衆三十餘戶踪跡派鄂博什
領兵追至達爾達木圖河官兵奮勇攻擊勦殺男
婦二百餘收其馬駝軍器等語此次勦賊効力之
委署營總瑪津泰署驍騎校溫泰托新著戴獎賞
翎仍同各官兵造冊送部照例議叙又據奏喀喇
沁臺站署章京旺楚克帶兵從濟爾哈朗護送行

糧並無失悞等語和楚克著賞戴孔雀翎亦同官
兵等送部議叙

諭大學士管理陝甘總督黃廷桂酌辦屯田耕種事
宜

上諭軍機大臣曰黃廷桂奏稱來春烏魯木齊屯田
准巴里坤大臣咨取耕牛五六百隻甘涼肅等處
牛隻僅敷耕種難於購辦除將收取厄魯特等牛
二百餘隻備用外請與巴里坤牧放之揀剩馬匹

一同解送等語。騾馬菜馬不堪乘騎者，雖可資耕犁之用，但軍營馬匹關係緊要。巴里坤牧放之馬，即有臆分不齊，總宜留備乘騎，不得因牛隻短少，遂為遷就。至烏魯木齊一帶地方，自宜廣為開墾，已傳諭管理屯田大臣，令其不必拘泥，即以人力犁鋤，亦無不可。如綠旗兵果能出力，自當量為獎賞。黃廷桂可并知此意，隨宜辦理。至甘省現存馬五千匹，朕意尚須豫備馬一萬匹，方足供緩急之

用昨歸化城副都統法起奏稱陝省營馬已買補
萬餘匹等語黃廷桂可飭令各營善為餵養以備
來年三四月間調遣其價值草料或於定例外因
時量為加增總期實足濟用可將此傳諭知之

甲戌

諭叅贊大臣富德查明鄂羅斯拜逃走情節

上諭軍機大臣曰據富德奏稱察哈爾護軍鄂羅斯
拜於十月二十五日夜騎牽馬匹逃走等語鄂羅斯

斯拜派往軍前効力反向哈薩克逃去情甚可惡
但伊雖哈薩克種類來投之後即作為護軍給與
產業養養二十餘年家屬俱在察哈爾有何被殛
情事隻身逃往哈薩克耶向來兵丁迷路則該管
官罪重若逃走則罪輕或該管官員希圖避罪以
逃走詳報亦未可定除將伊家屬交該總管暫行
嚴加監候外著富德將鄂羅斯拜或係迷路或實
係逃走查明具奏此時伊或潛回察哈爾著該旗

亦嚴行緝捕

諭山西四川督撫協辦馬匹牛隻

上諭軍機大臣曰黃廷桂請將軍營用剩之馬挑選數百匹為烏魯木齊等處屯田之用昨已有旨詳悉傳諭矣軍需馬匹不妨多為豫備著傳諭塔永寧於晉省營馬內擇其臚分壯健者酌撥二三千匹解甘其挑缺營馬另籌買補如定例價值不敷不妨據實奏明量為加增至烏魯木齊一帶屯田

需用牛馬甘省耕牛難購騾馬菜馬亦屬無多如
晉省民馬內除買補營馬外有騾馬及不堪乘騎
之細小馬匹俱可酌量收買或五六百匹或千餘
匹即行解赴甘省至川省所產犛牛頗多其馬匹
雖小不堪馳驅進剿而服犁耕地尚屬可用可傳
諭開泰將川省牛馬酌量購買一二千即騾馬亦
可湊數於來年陸續解交甘省即不能趲赴春耕
亦可補下年之用得此兩省協濟無煩另為籌辦

矣并傳諭黃廷桂其如何豫備員弁接收分送俟
開泰塔永寧咨到之日一面辦理一面奏聞

乙亥

封賞招服烏梁海之王公台吉等

上諭軍機大臣曰車木楚克扎布數年來効力行間
近復招服博和勒那木查爾等烏梁海善為撫納
著加恩封為郡王原任公多岳特自行告入叛逆
烏梁海寨內勤勞可念著加恩賞給公品級四等

台吉帕克穆伍良海陞授三等台吉伍良海身故
令伊子承襲內大臣察達克賞緞六端副都統赤
倫散秩大臣圖布慎各賞緞五端赤倫之弟察罕
賞戴孔雀翎署驍騎校索倫班圖巴爾虎扎卜俱
授為驍騎校索倫領催什第著署驍騎校其察達
克所屬得木齊收楞額及兵丁等著納穆扎爾酌
量賞給銀緞

丙子

諭叅贊大臣永貴等酌辦策應阿里衮官兵

上諭軍機大臣曰永貴奏派愛隆阿帶兵三百名策
應阿里衮等伊即往魯克察克籌辦軍務探聽阿
里衮愛隆阿信息等語所辦尚是但阿里衮等此
時恐已遠去不能追及則往返徒勞兵力可傳諭
永貴愛隆阿若不能追及阿里衮等或伊等由別
路撤兵即將愛隆阿調回

庚辰

命革叅贊大臣舒赫德職留軍營効力贖罪

上諭大學士曰舒赫德前在軍營屢干重譴朕皆曲
為寬宥今春西師兩路進剿一時不得其人將伊
加恩起用凡一切機宜俱詳悉面諭令其到軍營
時傳諭將軍成袞扎布并戒以不可如前恇怯善
為協辦軍務詎意舒赫德自進兵以來所辦諸事
全不奮勉成袞扎布係蒙古人雖經戰陣然未面
領訓諭舒赫德自應盡心襄助乃此次所辦諸事

動失機宜即如招服克勒特烏魯特等游牧後即當收其馬匹以益兵力使賊伎倆難施方得駕馭之道乃伊等任其屯駐山中致使賊有餘力大兵既過隨即叛逃舉此一端可見諸事全無成算及朕降旨詰責始東遮西露往來道途疲馬力於無用之地此皆舒赫德並不將朕諭旨詳悉傳示成衮扎布之所致也蓋兵法忌怯弱而舒赫德選懦性成兵法忌諱飾而舒赫德最工文過合計伊前

後罪譴即正法亦不為過但西路進兵以來雖未能就緒尚不至大挫軍威若即寘重辟伊反得諉過於成衮扎布矣朕念成衮扎布去年擒青滾雜卜之功看伊顏面賞舒赫德以不死然其不足復用所謂下愚不移亦屢試而知之者舒赫德著從寬免死革職令為兵丁自備資斧在軍營効力贖罪伊子舒常亦因加恩舒赫德復授為侍衛遣往軍營今舒赫德既經革職舒常仍革退侍衛發往

黑龍江至鄂實以叅贊大臣前往軍營不過隨同將軍行走並未奮勉効力亦當治罪但較之舒赫德尚屬稍輕鄂實著革職降為藍翎侍衛自備資斧在軍營効力行走

諭查勦叛賊琿齊等並定大臣侍衛等罪

上諭軍機大臣曰前命成衮扎布等來京沿途查勦巴哈曼隻等賊衆其叛逃之琿齊額林沁達瓦等令富德於歸途之便就近查勦伊等奉到諭旨但

將端濟布等所報巴哈曼隻爲得木齊哈勒拜所
殺隨帶兵進勦等語具奏而沿途曾否遇賊並未
奏及即端濟布追賊已久亦未聞探取信息奏聞
計此時琿齊額林沁達瓦等皆逃往沙喇擘勒來
歲進兵務宜留心勦滅至所奏總管職銜五十六
將應正法回人脫逃一名未經具報請革職治罪
五十六著從寬免罪降為藍領侍衛効力行走托
倫泰索取多爾濟馬匹以致控告甚不安靜理應

正法姑從寬革退侍衛効力贖罪再舒赫德屢獲
罪譴加恩復用乃不能領會訓旨協辦軍務若重
治其罪伊反得諉過於成袞扎布是以將伊革職
於軍營効力贖罪鄂實全未奮勉亦降為侍衛効
力行走已頒發諭旨成袞扎布雖不可謂無罪而
去年擒獲青滾雜卜功足相抵仍傳諭成袞扎布
兆惠等將軍營事務及端濟布所辦扎哈沁賊衆
信息作速奏聞

申諭大學士管理陝甘總督黃廷桂添派兵丁事宜
上諭軍機大臣曰據黃廷桂奏稱添派綠旗兵三千
名計哈喇沙爾等處屯田兵內抽調十分之六仍
須派兵一千九百名請於甘省標營及巴里坤屯
田兵內派足等語巴里坤屯田兵一千名若抽調
六百則該地恐不敷用宜酌量辦理昨聞賊衆投
往回部因慮兵力單弱又諭於三千綠旗兵外添
派五千黃廷桂想尚未奉到此旨看來各處屯田

兵數尚少若可耕處多則續派五千名即留十分之四亦無不可且先後兵八千名酌留一二千屯田六七千進勦均覺裕如黃廷桂其與雅爾哈善加意辦理

癸未

命兆惠為定邊將軍策布登扎布為定邊右副將軍成袞扎布仍為定邊左副將軍辦理北路事務上諭軍機大臣曰今命兆惠為定邊將軍策布登扎

布副之來年辦理進兵惟兆惠等是賴可傳諭兆惠當與策布登扎布富德同心協力不可自分畛域至額敏和卓因其熟悉回部情形人亦果毅已命為叅贊大臣在前隊行走兆惠等務宜優待以收其益一切軍前事務相機辦理善自策勵以奏膚功

叅贊大臣永貴疏奏阿里衮等進勦信息

永貴奏言臣於十二月初八日至吐魯番詢問

沙拉斯瑪呼斯賊人信息知阿里袞等前至哈喇沙爾賊衆伐樹舉火截斷山路因取間道捉生詢問知賊已逃往庫車阿里袞於十一月二十四日至哈喇沙爾之西南庫爾勒地方額敏和卓遣人持書往諭庫車頭目尚無信息臣伏思阿里袞等口糧宜為接濟今派愛隆阿等帶兵齎送查巴里坤運送軍營口糧駝隻回程經過吐魯番擬截留三百隻於闐展存貯米石內

動支起運至臣即應前往魯克察克辦事因吐
魯番取阿里袞等信息較近是以暫行駐劄其
阿里袞章奏文書均關進勦要務若有就近辦
理事件恐候報遲延請即行開看亟需辦理者
一面辦理隨即具奏奏入報

聞

命將軍大臣等來年進兵曉示回部

上諭軍機大臣曰來年進勦回部宜先傳旨曉諭以

波羅泥都霍集占兄弟在噶爾丹策零時獲罪拘禁大兵平定準噶爾始行釋放因係回部頭目令其仍歸故土安集所屬以承恩澤伊等自應感激圖報永矢恭順之忱乃敢戕害使臣稱兵抗拒情罪難逭但聞諸事皆霍集占陰謀不軌至波羅泥都頗圖安靜其屬下人等亦係一時被脅非其本心今大兵進勦惟正霍集占之罪若波羅泥都能將霍集占縛獻亦必宥罪加恩如此一面曉諭即

一面進勦不可按兵俟釁若伊等果相猜忌自於
軍事有益可傳諭兆惠及雅爾哈善等知之

申諭簡派魯克察克辦事大臣

上諭軍機大臣曰據成袞扎布等奏稱追勦沙拉斯
等賊衆已派哈寧阿愛隆阿陸續策應阿里袞等
永貴既奉命署理巡撫其辦理魯克察克事務舒
赫德巴祿即起程前往其巴里坤送來馬匹外再
送吐魯番馬三千匹派兵一千策應阿里袞等乘

賊不備速行掩襲收其馬駝牲隻則進勦回部並
增兵力等語屯田事務已諭雅爾哈善永貴定長
等辦理至署理巡撫何必定須永貴惟屯田最爲
緊要永貴宜加意奮勉舒赫德已降旨革職無庸
承辦巴祿亦不必前往來年再領隊進勦

諭副都統巴圖濟爾噶爾等改道解送馬匹

上諭軍機大臣曰哈寧阿奏額林哈畢爾噶一路氣
寒雪盛全無水草若軍營馬匹由此行走恐致損

臆惟自吐魯番至烏魯木齊雪薄而水草亦好兩路遠近相等已行文巴里坤大臣及解送馬匹官員等語所見甚是可傳諭巴圖濟爾噶爾等解送馬匹須由吐魯番一路經行若已向額林哈畢爾噶一路而前行未遠亦另行取道仍由吐魯番行走併諭巴里坤辦事大臣等知之

定邊左副將軍成衮扎布疏奏起程來京日期成衮扎布奏言臣欽奉

諭旨辦理北路事務來京請

訓謹將定邊將軍印信移交兆惠臣於十二月初四

日起程奏入報

聞

甲申

恩免甘省官員彌補軍需仍賞給督撫銀兩

上諭大學士曰據黃廷桂奏稱甘省各官承辦軍需
有借動公項墊辦銀十萬一千餘兩請撥補一半

其半仍令各該員自行彌補等語甘省連年承辦
軍需該督悉心籌畫董率屬員該撫吳達善同心
協力往來經理俱著勞績在事各員頗能奮勉出
力於閭閻毫無擾累深屬可嘉所有墊辦銀兩既
係因公費用著加恩免其彌補黃廷桂著賞銀一
萬兩吳達善著賞銀五千兩俱於正項錢糧內支
給用示優眷賢勞之意

丙戌

議派撥綠旗兵丁事宜

軍機大臣奏言臣等前經遵

旨傳諭黃廷桂於屯田綠旗兵內抽撥三千名再於
甘省各營添派五千名給與口糧馬匹令總兵
官馬得勝丑達帶領再派總兵官一員同領今
該督奏稱從屯田兵撥出一千三百名外添派
一千七百名仍於各營選派五千共八千名派
馬得勝丑達及總兵五福一同帶領其領隊將

弁速行各該提鎮遴選等語俱係遵

旨辦理應如所奏行又據奏減半撥給馬匹每兵各
給一馬官兵跟役亦俱減半給與是需馬不過
八千數百匹今甘省有未解餘馬二千匹又直
隸解甘馬五千匹自應即於此內選用仍於各
營挑選足額其軍裝器械等項統照進剿之例
辦給內盔甲一項不過壯觀無濟實用徒費駄
載口外用兵利於便捷應停其帶往查巴里坤

有存貯棉甲應按數給與事竣交回再甘省現辦駝二千隻僅供撥運行營口糧之用即塔永寧前後協辦駝五千隻恐一時不能即到該督所奏暫僱車輛每兵丁餘丁四人合給一車自屬通融籌辦亦應如所奏辦理至各兵口糧實不便多行裹帶今該督既稱於巴里坤裹帶一月口糧又辦羊二萬隻作一月口糧俟駝隻解到再為接濟事屬可行所有應增羊價及沿途

草料統於軍需項内核銷再屯田兵丁自應廣
為墾種臣等現在遵

旨傳諭該督於備勦兵內酌量抽撥應令遵照辦理
奏入

上從之



平定準噶爾方略正編卷四十七

欽定四庫全書

史部

平定準噶爾方略正編卷四十八至五十二

詳校官監察御史_臣孫家賢

通政使司副使_臣莫瞻菴覆勘

總校官進士_臣朱鈴

校對官編修_臣周厚轅

謄錄監生_臣汪瀾

欽定四庫全書

平定準噶爾方略正編卷四十八

乾隆二十三年春正月己丑

諭加給陝甘買補營馬及屯田牛隻官價

上諭大學士曰據苗廷桂奏稱現在陝甘買補摘缺

營馬官價八兩實有不敷及買解巴里坤等處屯

田牛隻請於官價四兩四錢外添給一兩六錢等

語兩省連年需馬甚多市價未免昂貴若拘定成

例誠有不敷著於定價八兩外准其加給二兩至
牛隻係本省農民所需用時屆春耕不惟官價四
兩四錢不足即增一兩六錢亦未必充裕若再加
二兩給以官平足數採買自屬易集而閭閻亦無
滋累因此次購辦過多特格外加恩以示體卹後
不為例

以接濟軍營牛馬事宜

諭大學士管陝甘總督黃廷桂

上諭軍機大臣曰據黃廷桂奏稱川省既無黃牛而
晉省騾馬多老不堪用已諭開泰塔永寧停其購
辦但令晉省於標營內挑取不中乘騎之驕馬一
二千匹解甘備用至軍營牛馬自應充裕現命軍
機大臣於太僕寺上駟院牛馬羣內挑取亦可以
資接濟著傳諭知之

庚寅

諭定邊將軍兆惠等奮勉相機進剿

上諭軍機大臣曰昨因將軍成衮扎布等辦理進剿毫無端緒業已分別示懲兆惠策布登扎布富德等領兵剿賊當以為戒同心協力自可奏功此時如逆賊阿睦爾撒納有竊發之信即將剿除賊黨及辦理回部之事暫行停止專意擒拏若無信息則將沙喇拏勒賊衆回部諸城於本年內辦竣方為妥協數年來屢次用兵自當休息即阿逆未就擒獲亦可相機辦理著傳諭兆惠策布登扎布富

德等知之

諭叅贊大臣雅爾哈善等傳示阿奇木伯克霍集斯
上諭軍機大臣曰從前平定伊犁時達瓦齊敗走回
部為圖爾璦阿奇木伯克霍集斯等遣阿舒爾瑪
特擒送軍營不知此時圖爾璦地方尚係伯克霍
集斯辦事抑或更替他人可傳諭雅爾哈善等於
進兵時訪問若仍係伯克霍集斯辦事則即向伊
等云爾等從前將達瓦齊擒獻係有功之人皇上

即施恩賞賚尚欲陸續加恩因辦理厄魯特等無暇今厄魯特等俱已平定領兵前來專為問兩和卓木之罪與爾等無涉爾等惟誠心效順自必永承恩澤仍酌賞緞疋等物以示獎勵凡大兵經過地方皆當如此宣示及酌量獎賞俾回人聞風歸嚮或將逆酋拏送亦未可定即不然而衆心內附逆酋等自必力窮無助我兵擒勦亦易如歸附人等有奮勉行走者更宜核實獎賞雅爾哈善等當

加意辦理

諭定邊將軍兆等專辦進勦沙喇肇勒賊衆

上諭軍機大臣曰兆惠等奏稱正月內馬匹送到即
進勦巴圖爾烏巴什等再往葉爾羌喀什噶爾擒
拏波羅泥都霍集占倘辦不隨意不能即入回部
則且屯田積穀市哈薩克健馬俟次年整兵再進
等語兆惠等所見亦是但不可有意遲疑惟當相
機以應如上年進兵時即計及辦理回部其後竟

如所言今謂賊人在沙喇擘勒恐又復他往或向
內來俱未可定若伊等果在沙喇擘勒坐食勢必
貧人盜竊其富家不堪為命互相殺害斷無安靜
之理我兵乘機取之甚易兆惠所奏未免豫留地
步即非有心觀望而怯懦固其本懷以為事若無
成伊已先為奏及不知臨時果有阻滯即俟次年
辦理又有何礙況策布登扎布陞辭日朕已諭今
年儘力趕辦如趕辦不及即明歲辦理亦可且辦

理回部現諭添派綠旗兵八千名兆惠惟帶原議
四千兵前往沙喇鄂勒其辦理回部已命雅爾哈
善額敏和卓前往觀今日兆惠所奏顯係以兵少
為慮欲留雅爾哈善所帶之索倫兵一千用壯聲
勢耳可於綠旗兵八千內派出一千合原議之四
千兵前往沙喇鄂勒其索倫兵一千仍令雅爾哈
善帶往

諭叅贊大臣雅爾哈善等專辦進勦回部

上諭軍機大臣曰朕因兆惠有辦理需時之慮已命專辦沙喇鄂勒賊衆其葉爾羌喀什噶爾回部令雅爾哈善額敏和卓二人辦理已添派綠旗兵八千名合之雅爾哈善所帶索倫兵一千自足敷用額敏和卓熟悉回部情形伊等盡心商酌以奏膚功即或今歲不能竣事惟整兵前進蹂其禾稼振旅而還彼力自絀將來進取更易至額敏和卓傳示庫車回人之事及此次進兵何時起程作何辦

理著即行奏聞再兆惠處侍衛頗多雅爾哈善進
兵時可洛取數人以備差遣

辛卯

申諭將軍大臣進勦事宜

上諭軍機大臣曰昨命兆惠雅爾哈善等分路進勦
以專責成但兆惠既有畏難之心雅爾哈善至今
猶未至魯克察克朕心深為廕念辦理沙喇擘勒
賊衆已派兵五千自屬裕如兆惠等宜加意擒勦

不留餘孽若仍不能集事朕惟兆惠是問至由庫車阿克蘇進兵回部雅爾哈善惟與額敏和卓同心協力資其計畫加以鼓舞不可稍存歧視再額敏和卓所屬之回兵亦屬可用宜向彼商酌派出或得一千或得數百即將綠旗兵照數撥除此項撥除兵丁所分例著賞給回兵

分派直省大員專司巡察臺站

上諭軍機大臣曰自京至巴里坤所設臺站向俱特

派人員巡察今觀內地軍臺遞送事件較前稍覺
遲滯總因日久懈弛馬匹亦多疲乏著將直隸軍
臺事務交按察使永寧山西軍臺交按察使明山
陝山軍臺交布政使武忱自甘肅至巴里坤軍臺
交巡撫吳達善專司巡察管理如馬匹有疲乏者
或令更換或於事簡臺路調撥壯健者應用其應
如何辦理之處即各具摺奏聞

命獎勵巴里坤至軍營臺站官兵

上諭軍機大臣曰數年進兵以來自巴里坤至軍營
所設臺站官兵馳送事件尚無貽悞且有勦殺賊
衆奪回刦擄官物者應加特恩以示獎勵著永貴
吳達善查明臺站筆帖式內有遇賊勦殺奪回官
物者或即題補本部主事或交部議叙請旨其餘
兵丁驟賞兩月錢糧巴里坤以外臺站事務即著
永貴巡察管理臺馬有疲乏者即會同吳達善等
調撥更換

壬辰

諭續送軍營馬匹派給魯克察克之索倫兵丁

上諭軍機大臣曰昨命黃廷桂再辦馬二千匹留富
紹於巴里坤續送烏魯木齊軍營今雅爾哈善領
兵由魯克察克進發著改送魯克察克分給所領
索倫兵一千名富紹將馬匹交收後即在雅爾哈
善隊內行走其巴圖濟爾噶爾郭木尼勒圖將前
起馬匹送至烏魯木齊即在軍營行走可傳諭兆

惠雅爾哈善富紹等知之

申諭叅贊大臣雅爾哈善辦理回部事宜

上諭軍機大臣曰朕昨諭雅爾哈善將額敏和卓所屬回兵派出進剿因伊等情形熟悉而額敏和卓亦便於指使但恐回人馬匹不數著傳諭雅爾哈善將原派綠旗兵每人馬一匹照數給與回兵此次辦理回部朕專交雅爾哈善額敏和卓二人應進兵時即一面具奏一面起程惟知會將軍兆惠

毋庸往返洛商再雅爾哈善等由阿克蘇庫車進
取葉爾羌喀什噶爾等城所有收獲器什除應交
內府者酌量齎送外其衣服等物即獎賞兵丁至
軍器馬駝尤當盡行查取以給軍用

諭定邊將軍兆惠等進勦賊衆事宜

上諭軍機大臣曰聞向來進兵時自哨探兵丁外又
派數十人瞭望謂之墨爾根哨探兵凡行兵遣發
哨探特為豫偵賊人信息掩其不備之意今於哨

探隊前復遣人行走設為賊所窺得以豫作準備而大兵遠隔一時不能猝至轉似與賊送信者然是名為審慎其實自示怯懦有何裨益此次進兵不過與大營相去四五十里間遣發哨探一見賊踪即行馳報則大隊兵丁自可接踵迎擊至厄魯特性習反覆無定往往自相戕害從前達瓦齊在伊犁時人心尚且離散今日豈有堪為統率之人即如巴圖爾烏巴什亦嘗收合黨衆究未聞推為

台吉今又伏冥誅則哈薩克錫喇等小醜焉能使
衆賊服從且衆厄魯特等已成嗎哈沁冬寒竄伏
棲止一處必致互相爭奪大兵乘其潰亂迅往襲
擊立可奏功兆惠等勿因其烏合之勢過為顧慮
即遵朕節次諭旨相機辦理

諭戶部侍郎阿里衮等酌量勦賊撤兵

上諭軍機大臣曰據阿里衮等奏稱現在前往庫車
於所到山谷內搜捕嗎哈沁偵探賊人踪跡等語

阿里衮等前次奏事距今二十餘日朕心深為厯念今雖稱尋踪追賊然伊等兵馬之力如何未經奏及前已降旨令伊等撤兵令額敏和卓同雅爾哈善辦理回部此時能收服庫車回衆固善否則竟回游牧暫息再整兵往魯克察克一切與雅爾哈善商酌辦理阿里充亦不必前赴軍營仍回巴里坤辦事

癸巳

命華職原任巡撫盧焯在巴里坤辦理糧餉處効力

甲午

命副都統濟福等馳驛前往青海辦事

上諭軍機大臣曰副都統濟福帶領乾清門二等待衛查拉豐阿察哈爾三等侍衛那木查爾差往青海有應辦事件濟福著賞銀五十兩查拉豐阿那木查爾各賞銀三十兩整裝馳驛前往

諭副都統濟福等備勦沙喇斯瑪呼斯賊衆

上諭軍機大臣曰去年進勦厄魯特叛賊餘黨分路
逃竄近據阿里衮等奏稱沙喇斯瑪呼斯賊人俱
逃向愛什瑪山之東南察其踪跡應在呼爾塔克
山羅卜淖爾等處藏匿等語羅卜淖爾等處與噶
斯相近可通青海或賊人逃往彼處亦未可定因
特派濟福查拉豐阿那木查爾前赴西寧與副都
統德爾素青海郡王索諾木丹津貝子那木查爾
策凌等會同辦理濟福等至西寧德爾素即同往

青海令索諾木丹津等派兵一千聽候調遣仍選
派熟識路徑兵丁三四十名交查拉豐阿那木查
爾等帶往噶斯一路跟尋賊人踪跡若有藏匿逃
竄之厄魯特等查拉豐阿報知濟福等即帶兵前
往搜勦若並無踪跡查拉豐阿等亦即回京濟福
可傳諭索諾木丹津等密為豫備不必宣露

諭叅贊大臣雅爾哈善等酌辦沙喇斯瑪呼斯賊衆

事宜

上諭軍機大臣曰據阿里衮奏沙喇斯瑪呼斯賊人
向愛什瑪山之東南呼爾塔克山逃去呼爾塔克
山與羅卜淖爾相近等語因披覽地圖呼爾塔克
山羅卜淖爾等處與魯克察克相近未知阿里衮
曾否行文雅爾哈善等可傳諭雅爾哈善在魯克
察克一帶留心訪查此時阿里衮若已追及賊人
固善倘又逃往他處或向噶斯一路已調青海蒙
古兵丁豫備堵截再呼爾塔克山等處既與魯克

察克相近去巴里坤亦當不遠巴里坤大臣等亦應遠設卡倫加意瞭望如有賊人蹤跡即行搜勦似此分途防範賊衆自難藏匿又

諭曰據舒赫德等奏稱闢展秋收豐稔已行文黃廷桂派綠旗兵四百名今歲廣為墾種等語所辦尚是但舒赫德已革職令於軍營効力將軍等遣往魯克察克辦理沙喇斯等賊衆看來非伊所能承辦可傳諭雅爾哈善等就近堵勦若賊踪甚遠亦

無關緊要即於進勦回部之便再為搜捕亦可舒
赫德不必在魯克察克即遣回軍營効力贖罪至
屯田一事實為要務亦傳諭雅爾哈善永貴等矣
雅爾哈善在軍營無應辦之事著速至魯克察克
與永貴商辦一切若屆進勦回部之期即宜奮勉
前往

乙未

命優卹哲卜尊丹巴胡土克圖

上諭軍機大臣曰喀爾喀親王桑寨多爾濟等奏稱
哲卜尊丹巴胡土克圖於去冬圓寂等語哲卜尊
丹巴胡土克圖係喀爾喀四部落遵奉之大喇嘛
雖不比前人德壽兼全久興黃教然伊在時亦能
作興黃教極力安衆朕用是疊沛恩施常加優禮
今聞圓寂深為軫惻著加給敷教安衆喇嘛封誥
印信照舊例頒賜器幣鞍馬品物以示優卹

丙申

諭乾清門頭等侍衛官長保獎勵內大臣察達克
上諭軍機大臣曰納穆扎爾等奏據車木楚克扎布
等呈稱遵旨將訪查阿睦爾撒納信息傳諭察達
克察達克以遣人前往俄羅斯恐形跡可疑於事
無益查俄羅斯圖喇外有從前逃走之烏梁海特
楞古特擬帶兵以擒拏逃人為名訪取阿逆確信
若可擒拏即行呈報等語察達克所見甚是近因
此事特命官長保前往著傳諭官長保獎勵察達

克即就伊所見相機辦理阿逆若果在俄羅斯圖
喇附近毋論內外酌量擒拏若相離甚遠不必輕
進即訪取確信作速奏聞再伊等往俄羅斯圖喇
時官長保自宜同行如察達克等有恐內廷侍衛
分功之意即不必前往

丁酉

命議叙甘肅辦解馬匹官員

上諭大學士曰據巴里坤辦事大臣等奏稱甘肅解

送軍營馬一萬二千匹俱陸續妥協解到今已辦
理起程等語黃廷桂辦解軍營馬匹妥協無悞深
屬可嘉黃廷桂及承辦馬匹官員俱交部議叙其
解送馬匹至巴里坤官兵著黃廷桂查明官員交
部議叙兵丁酌量加恩賞給以示鼓勵

戊戌

命喀爾喀扎木巴勒多爾濟喇嘛掌管喀木布諾門

汗印信

上諭軍機大臣曰據桑寨多爾濟奏稱尚卓特巴遜
都卜多爾濟等請將札木巴勒多爾濟掌管經教
衆心悅服等語著照所請將喀木布諾門汗之印
給與札木巴勒多爾濟掌管勤宣黃教約束喇嘛
其尚卓特巴遜都卜多爾濟著協辦事務
命解送回人阿卜都爾瑞來京

軍機大臣奏言哈密拘禁莽噶里克差遣之回
人阿卜都爾瑞及跟隨阿舒爾瑪特三達色前

來之回人厄魯特共二十三人查阿舒爾瑪特
三達色拏送京城時阿舒爾瑪特於途次病故
現在拘禁之阿卜都爾瑞係莽噶里克遣探信
息之人應行正法其餘二十二分賞額敏和
卓王素富之處請

旨遵行奏入得

旨著將阿卜都爾瑞解送來京

庚子

命停止副都統愛隆阿議敘

定邊將軍兆惠奏言據副都統愛隆阿呈稱伊
從前擒拏巴雅爾與哈薩克對陣奪回奇徹布
尸骸叅贊大臣富德俱未奏報等語臣等照伊
原呈查詢富德據稱查從前愛隆阿原報並無
奪回奇徹布尸骸之語查詢隨從奇徹布兵丁
麟保諾卜奇俱云伊二人護守尸骸送赴軍營
愛隆阿欲留奇徹布之馬經貝勒羅卜藏多爾

濟勸解始發給馱載至擒拏巴雅爾後即委羅卜藏多爾濟愛隆阿等將官兵功次呈報將愛隆阿領隊行走之處特為聲明業經蒙

恩交部議叙惟圖倫楚達禮善等因一時遺漏復補請加

恩並無隱匿等語臣等查愛隆阿呈詞情節與原報不相符合顯係爭功妄控伏乞

皇上勅部將愛隆阿嚴加議處以為軍營造言生事

者戒奏入

上諭軍機大臣曰據兆惠等奏稱愛隆阿呈控伊從
前擒拏巴雅爾及奪取奇徹布尸骸等事俱為富
德隱匿今查擒賊功次已經奏報而奪取奇徹布
尸骸伊原報並無此事等語愛隆阿貪功訐告甚
屬器小理應從重治罪但伊此行走尚為出力
著加恩免其治罪所有議叙之處即著停止又
諭曰愛隆阿以領隊大臣在軍前効力行走已降旨

交部議敘自無可格外加恩伊乃貪功告訐其意以羅卜藏多爾濟晉封王爵伊第邀議敘心懷不足耳殊不思羅卜藏多爾濟係蒙古台吉從軍出力固應加恩即循次晉階亦其常分愛隆阿何可相比今但停止議敘免其治罪已屬加恩前曾降旨令在雅爾哈善隊內行走此次進兵伊當知立功自贖若不奮勉効力必將伊從重治罪斷不寬宥并將此曉諭愛隆阿知之

諭叅贊大臣雅爾哈善酌留索倫接馬兵丁帶往

上諭軍機大臣曰雅爾哈善奏於十二月二十日起
程往魯克察克前諭雅爾哈善將兆惠所領索倫
兵一千名帶領前進此時若已到魯克察克甚善
若尚未到現有接取解送馬匹之索倫兵丁雅爾
哈善即可存留帶往一面咨行兆惠於遣來索倫
兵內合計所留兵數裁扣亦通融辦理之法併傳
諭兆惠知之

命將私閱軍臺文報之五十七拏解巴里坤正法

上諭軍機大臣曰據兆惠奏稱查出私開文報之委
署臺站筆帖式五十七請即正法等語軍臺文報
關係緊要五十七以委署筆帖式竟敢私行竊看
情甚可惡著將五十七拏解將前項情節沿途通
行曉示各臺站人等至巴里坤即行正法

諭定邊將軍兆惠等奏報進兵日期

上諭軍機大臣曰兆惠等從前擬定今年正月內起

程進兵今已屆初旬矣或就馬匹解到即行起程
或待草青以濟馬力俱當奏報軍營奏事數日不
至朕即為廕念雖時當新歲例有行禮筵宴等事
而伊等在外時切瞻懷豈以朕為令節歡娛竟忘
爾等耶朕豈如是之主耶兆惠富德皆內廷行走
之人豈不知朕意伊等理宜用心辦理一切諸務
其應行辦理者即行辦理應陳奏者即行陳奏乃
何以並未奏報即如巴圖爾烏巴什身死果實則

但餘舍楞等辦理更易至衆賊烏合未知哈薩克
錫喇亦在其內否或在沙喇壩勒居住或漸移近
地此等情節兆惠等亦當遣發哨探擒拏嗎哈沁
詢問伊等曾否如此辦理於何時進兵馬力若何
俱作速奏聞

甲辰

喀爾喀親王桑寨多爾濟等疏奏逆賊阿睦爾
撒納出痘身死

桑寨多爾濟等奏言本年正月初七日據俄羅斯畢爾噶底爾遣圖勒瑪齊畢什拉等報稱阿睦爾撒納因被追兵所迫入我交界溺水幾斃我卡倫人等救出拏送固伯喇納托爾處監禁旋即出痘身死我固伯喇納托爾念與大國和好若但將阿睦爾撒納身死情節備文通知恐不足取信今將伊身尸移至我等邊界大國連遣人來或至塞楞格城或至恰克圖邊界驗看

等語臣等伏思阿睦爾撒納一案節經理藩院行文該薩納特衙門理應將阿逆身死備文移覆乃伊等邊界頭目但移知臣等其中或有別情況伊等並不將同阿逆拏獲之人若干是何名目或同阿逆尸骸解送與否現今身尸或已腐壞或尚完全分晰具報殊屬含混可疑臣等現將此等情節行文畢爾噶底爾等令其據實聲明即派頭等台吉齊旺扎卜前往察看情形

俟回文到日具奏奏入

上諭軍機大臣曰桑寨多爾濟等據俄羅斯邊界報稱逆賊阿睦爾撒納出痘身死今將身尸移至恰克圖等處請遣人驗看等語看來逆賊阿睦爾撒納罪惡貫盈身死屬實林丕勒多爾濟向認識阿睦爾撒納今天氣尚寒逆尸想未腐壞接到此旨桑寨多爾濟即遣林丕勒多爾濟速往恰克圖驗看並曉示彼處頭目云爾等念兩國和好將逆賊

之尸送來以彰信義大皇帝深為嘉悅已命理藩
院行丈爾薩納特衙門一面命我取逆賊身尸解
送京師等語如逆尸已到恰克圖林丕勒多爾濟
即取以來倘伊等謂逆尸在塞楞格城亦即前往
驗看勿因恰克圖是交界在彼住候或伊等祇令
驗看不肯發遣務宜嚴行曉示仍先期作速奏聞
委署前鋒叅領觀音保前鋒奎思德以護送哈
薩克貢馬至京

命在雅爾哈善隊內行走各賞銀三十兩

乙巳

命卹敘進勦扎哈沁官兵并

訓諭將軍大臣等

上諭軍機大臣曰據兆惠等奏稱鄂實等領兵追勦
逃往瑪納斯河源之扎哈沁哈勒拜等官兵奮勇
殺賊一百四十餘人獲馬駝軍器甚多厄魯特侍
衛達爾漢等九人陣亡侍衛老格等二十六人得

傷等語此次官兵勦賊甚屬奮勉厄魯特侍衛達爾漢乃達什達瓦屬人從前因進勦納木奇庫圖齊訥爾鄂拓克較衆尤為出力是以授為二等待衛賞給巴圖魯名號今奮勇捐軀深為憫惻著加恩賞給雲騎尉令伊子承襲仍將伊戶口移於察哈爾照例安插并將此旨傳示達什達瓦屬人及軍前厄魯特等侍衛官員其餘陣亡得傷官兵俱交部照例議卹議叙至此次進勦正值隆冬大雪

之時馬力自當疲乏尚能勦賊奏功使去年進兵
若此何患無成彼時鄂實係叅贊大臣有事但諉
之將軍不加策勵今自知負罪不敢如去年之互
相推諉是以直前勦賊朕深悉其隱著傳諭兆惠
等進兵之時當似此各知奮勉不可稍存意見並
將鄂實畏罪圖功之處曉示衆人鄂實著加恩授
為三等侍衛瑚爾起端濟布與効力官兵亦著交
部議叙以示鼓勵

命安插哈爾察海戶口於巴里坤

上諭軍機大臣曰兆惠等奏招降噶爾藏多爾濟之
哈爾察海等七十餘口揀選七人作為嚮導餘交
巴圖魯侍衛齊努渾解送巴里坤候旨等語哈爾
察海等見我九人前往招降即率二十餘戶歸順
非兵威迫脅可比從前因厄魯特等反覆無常故
送往肅州正法今助惡逆黨俱多殲滅此輩原無
闕緊要當酌量安插稍給產業同綠旗兵支領錢

糧以供調遣使衆厄魯特聞知猜懼之心稍釋其
藏匿餘賊自必來投庶疆圉可以永靖著傳諭巴
里坤大臣等現在哈爾察海等即遵照酌量安插
嗣後有似此者一體具奏俟事竣之後量其情節
分別辦理并傳諭兆惠知之

以逆賊阿睦爾撒納身死情節

諭定邊將軍兆惠等

上諭軍機大臣曰昨俄羅斯報稱逆賊阿睦爾撒納

入伊邊境出痘身死將尸送驗等語看其情節尚
非虛假蓋前此逆賊尚存俄羅斯未必不思留用
是以遲久未見擒送今伊已死留尸無益又恐反
傷和好因報明送驗此亦情理之可信者已遣林
丕勒多爾濟往取逆賊之尸著傳諭兆惠於進兵
之便再留心訪查使所得信息與俄羅斯告語相
符則尤確實足信矣然逆賊阿睦爾撒納雖死而
哈薩克錫喇舍楞等尚未就擒兆惠等勿因此稍

存懈怠務宜加意奮往速奏膚功并傳諭雅爾哈
善等知之

丙午

以逆賊阿睦爾撒納身死

宣諭中外

上諭大學士曰準噶爾一事自用兵以來伊犁既已
蕩定而哈薩克汗阿布賚等亦輸誠內嚮實皆仰
荷

上蒼之默佑

列祖之鴻庥獨因叛賊阿睦爾撒納逋逃未獲以致勞
我師旅於今年蓋此賊一日未能成擒則西事
一日不能就緒不得不極力追捕以為邊圉久遠
之計非朕之好為窮兵黷武從前所降諭旨甚明
去歲聞阿睦爾撒納竄入俄羅斯境內俄羅斯向
為和好之部定議彼此不許容留逃人况阿睦爾
撒納罪大惡極尤非他逃人可比當令理藩院行

文俄羅斯薩納特衙門向索今據辦理俄羅斯邊
界事務喀爾喀親王桑寨多爾濟等奏稱俄羅斯
畢爾噶底爾差圖勒瑪齊畢什拉等前來并移文
內稱阿睦爾撒納逃至伊境渡河被溺隨經救出
拘禁旋因患痘身死今將尸獻出等語若惟恐不
能取信於天朝而亟亟以獻尸為確據者夫以阿
睦爾撒納之貪殘狡詐貽害生靈負恩悖叛天良
滅絕即暫逃於顯戮必難遁於冥誅斷無久延視

息之理其身死諒無可疑至俄羅斯之收留叛賊
始未嘗不欲撫而用之及其已死無可希冀然後
獻出亦係其實在情節且彼既以謹守舊約克全
信義為詞自不當逆料其詐拒而不受更行深責
也況國家之所期必獲者不過一阿睦爾撒納耳
今其人已死其尸已得準噶爾全局自可以告厥
成功朕惟以大公之心為順應之舉斷不肯恃我
國威誅求過當萬一所獻不實意圖欺罔則其曲

自在俄羅斯彼若妄生事端則朕可以上告

天

地而下對臣民再興師問罪亦未為遲即無知苟安之
徒亦無從議朕為好武矣始議向俄羅斯索取阿
睦爾撒納時衆人之意未必不竊議又生邊釁是
總不知罵馭外藩之道示之以謙則愈驕怵之以
威則自畏此二言若子孫世世能守實大清國億
萬年無疆之床也即如漢唐宋明和親稱姪歲幣

屢增是亦遜讓之極矣而於邊患寧稍救耶即如
俄羅斯既已收留叛賊若不嚴行索取彼必不將
尸獻出設從史貽直陳世倌所議且將遷就隱忍
竟若叛賊一入俄羅斯遂無可如何者所謂唾面
自乾之為朕甚恥之朕於軍國重務惟有乘機度
勢因物順理不但初無構釁於俄羅斯之心即此
用兵三年雖未如康熙雍正年間之久而朕已慮
衆人之勞時切於懷特因叛賊未獲萬難中止初

非朕之本意也。向使前後在事諸臣果能迅合機
宜則叛賊自不至逃竄亦當早為弋獲何至輾轉
愆期此用人不當實朕之愧然統計連年軍興徵
調皆出自公帑不但未加賦閭閻而賑卹有加於
往歲此亦天下臣民所共知者今逆尸已獲伊犁
全部悉入版圖徐謀耕牧續成

皇祖

皇考未竟之緒而自古未通中國之哈薩克亦皆稱臣

納貢其於我皇清疆宇式廓萬年久安之道為有
益為無益朕亦不更置論至葉爾羌喀什噶爾等
回部原可計日平定不必更煩動衆所有阿睦爾
撒納身尸俟解到之日驗明戮示以彰國憲先將
此通行曉諭知之

臣等謹案阿睦爾撒納負

恩逃叛聯豫駢走之餘尚思潛踪煽惑其在哈薩克
時即遣人入俄羅斯冀增狡窟以逋刑憲且

其反覆叵測衆所稔知若非悉力窮追或致
跼伏滋蔓誠有如

聖諭所云阿逆一日不除西陲一日不靖者乃哈薩
克既悔過輸誠驅先渠於境外而俄羅斯於
容納之初屢詞嘗試

皇上洞燭情偽飭索綦嚴且搜捕餘孽聲威四訖阿
逆雖逃顯戮遂伏冥誅其罪大惡極自不能
復容於

覆載於理固實有可憑而俄羅斯當阿逆尚存或不免
稍懷觀望及其既斃則豈肯因臭腐之骨致
失恭順之忱呈報逆屍時不容緩於情更確
有可信由此益見

德威昭播遠服驚懷尺一所傳捷於影響當

廟謨甫授之時彼狃於目睫之見者方慮索逋寇以
啟釁端務為姑息奚啻夏蟲之不可語冰今

恭讀

諭旨示之以謙則愈驕怵之以威則自畏誠為駕馭
外藩之要道我

國家億萬世無疆之福所當敬守而弗違者也

丁未

授巴圖魯侍衛老格為二等待衛

上諭軍機大臣曰巴圖魯侍衛老格同鄂實等追剿
扎哈沁賊衆臨陣得傷洵屬奮勉効力著加恩授
為二等待衛

平定準噶爾方略正編卷四十八

欽定四庫全書

平定準噶爾方略正編卷四十九

乾隆二十三年春正月戊申

申諭和碩齊唐喀祿等搜捕逸賊

上諭軍機大臣曰阿桂等奏稱和碩齊唐喀祿遵旨將哈薩克使臣送至邊界即前往額爾齊斯之和尼邁拉呼布空郭勒地方堵截逋逃賊衆等語著傳諭和碩齊唐喀祿伊等口糧充足前至駐劄地

方不可徒為坐守須向各處巡查如有隱匿逃竄之賊即奮勉擒剿勿致免脫

命賞副都統職銜莫尼扎卜食俸

上諭軍機大臣曰阿桂等奏據車木楚克扎布報稱莫尼扎卜等追勦烏梁海鄂木布屬人一百餘戶惟五戶逃入俄羅斯邊界其餘俱行擒勦將婦女分賞烏梁海兵丁等語莫尼扎卜招服烏梁月頗知奮勉今追勦鄂木布屬人又能迅速奏功深屬

可嘉著賞給副都統俸以示獎勵

獎諭哈密貝子玉素富隨征効力

上諭軍機大臣曰吳達善等奏稱哈密貝子玉素富
呈請帶領回兵一百名隨營効力等語玉素富係
回部望族今聞辦理葉爾羌喀什噶爾等回部情
願帶兵効力深可嘉獎著照所請同雅爾哈善額
敏和卓前往所有應得分例照蒙古貝子賞給回
兵照綠旗兵丁例賞給果能奮勉朕將格外賞給

著吳達善遵照傳諭辦理

訓諭巴里坤辦事巡撫吳達善

上諭軍機大臣曰吳達善奏稱現在辦解馬駝等項
請俟續調馬匹糧餉事竣後再回本任等語軍營
辦理事務必需大員駐劄倘事竣而阿里衮已至
吳達善自可回任若尚未前來則應仍留辦事乃
遽行奏請顯係思家念切遂不覺率爾陳詞豈滿
洲大臣遇事勇往者所宜出此著傳旨申飭

原任藍翎侍衛圖爾番以差看臺站中途回轉
革職來京

命仍以防禦職銜往西路軍營効力

已酉

諭署定邊左副將軍納穆扎爾辦理新舊烏梁海等
事宜

上諭軍機大臣曰納穆扎爾所奏莫尼扎卜等速勒
鄂木布屬人將擒獲賊衆分別首從正法治罪及

指給博和勒等游牧歸併管轄屬人等事俱令酌量辦理莫尼扎卜奮勉効力已加恩令食副都統俸其餘奮勇得傷人等酌賞緞疋銀兩前諭察達克往俄羅斯圖刺探取逆賊阿睦爾撒納信息今據俄羅斯報知逆賊身故自可無庸前往昨命官長保所賫賞物即行頒給仍傳諭察達克等以阿睦爾撒納既死邊界之事全無可慮不過辦理沙喇擘勒等賊事竣後伊等即永遠安居從前令伊

等游牧內移恐被賊黨擾害今內外皆朕疆土無可分別所有新舊烏梁海或願在伊舊游牧或於現住處所稍向外移俱可再總管那木查爾因出痘暫留今據伊子報稱身故是否確實著納穆扎爾查奏

以定邊左副將軍成衮扎布所奏機宜

諭軍營將軍大臣等

上諭軍機大臣曰成衮扎布奏稱前年投來軍營之

庫車伯克鄂對烏什伯克塞梯巴勒氏噶岱默特等請交與額敏和卓令其招降舊屬再將軍大臣等前往沙喇擘勒經過納林特穆爾圖淖爾等處宜曉示布魯特人等令將霍集占等擒獻等語成衮扎布所見甚合機宜現在雅爾哈善等辦理回部著將奏摺錄寄閱看并傳諭兆惠若舊伯克鄂對等尚在軍營即送至額敏和卓處令其招降舊部再布魯特原與回人相善恐不知辦理緣由或

協助霍集占等兆惠經過其地須曉示伊等以準
噶爾俱已平定伊犁等處現在駐兵屯田哈薩克
全部歸降今因霍集占等背叛興師問罪恐爾等
妄生畏懼其各安居游牧若霍集占窮蹙來投即
行縛送大皇帝當格外施恩亦傳諭雅爾哈善知
之

以去年進勦情節

訓諭將軍大臣等

上諭軍機大臣曰朕閱成衮扎布所奏去年進勦情節則兆惠未免巧於趨避當逆賊阿睦爾撒納為我兵擊敗兆惠身為將軍自應親行追逐乃駐兵濟爾哈朗惟以勦賊立功垂名史冊等空言催促富德前往經朕降旨詰責伊始帶兵策應彼時因辦事人少從寬未加深究至巴圖爾烏巴什等賊在兆惠等軍營附近伊並不陳奏蓋恐奏明即著令擒拏耳但擒獲巴雅爾勦殺都爾伯特納木奇

等尚屬奮勉至朱爾都斯一路既早得巴圖爾烏
巴什信息乃經朕降旨詰問始行陳奏在將軍成
袞扎布未面聆訓旨不知事之本末尚可原諒舒
赫德選懦避事亦與兆惠相似其情節早已洞鑒
朕辦理庶務一秉至公比中外所共知者兆惠比
次進兵能知己過諸事實心辦理則可若仍趨避
取巧朕不能再為曲宥也

辛亥

以俄羅斯哈薩克情形

諭副都統順德訥等

上諭軍機大臣曰順德訥努三等奏葉克明安德濟特以阿睦爾撒納之嫂為妻聞阿逆敗逃即帶阿逆後妻自森博羅特入俄羅斯又哈薩克齊奇玉斯之阿布拉該爾久送伊子於俄羅斯為質阿布賚亦近俄羅斯疆界過冬等語伊等詢訪之處自屬確實但現在俄羅斯之畢爾噶底爾報稱阿逆

出痘身死將其尸送驗則阿逆已伏冥誅俄羅斯
亦克全和好德濟特即竄匿其地亦無能為自可
置之不論至哈薩克之人本畏俄羅斯即如伊等
前曾向噶爾丹策零納貢因我師平定準噶爾即
率屬歸降則其與俄羅斯交好自屬事勢宜然且
哈薩克若抒誠入貢自當賞賜以示綏懷即不來
亦無足重輕伊之畏俄羅斯與否更無庸介意著
傳諭順德訥等知之

命頭等侍衛努三來京

上諭軍機大臣曰據努三奏今年辦理厄魯特回部
懇請派伊於哨探隊効力等語現在進兵官員分
派已定努三係烏拉齊等性習所奏事件文義繁
瑣覽之多不可解是以諭令來京面詢哈薩克情
形如有伊可効力之處再行差遣其奏留軍營之
厄魯特通事察罕庫本班第二人亦令帶來伊等
俱係巴雅爾扎哈沁屬人業將伊游牧人等勦殺

恐留彼聞知不免疑懼伊等隨軍効力並無罪過
朕當酌量加恩若有妻子并交黃廷桂查出解送
來京

申諭定邊將軍兆惠等進勦舍楞等事宜

上諭軍機大臣曰順德訥奏據哈薩克多羅特拜巴
圖爾等告稱聞巴圖爾烏巴什出痘身死哈薩克
錫喇之衆俱為嗎哈沁惟舍楞由車陳哈喇逃往
沙喇壁勒哈薩克之齊奇玉斯努爾賚汗兄弟已

兩路帶兵追逐等語從前朕即謂沙喇孛勒賊衆
人心渙散力亦甚窮我兵一到即可殄滅今順德
訥所奏情形果不出所料再據奏稱哈薩克阿布
勒比所言伊帶兵前至伊犁薩璫捉生詢問知舍
楞等雖有萬餘戶現俱乏食但不行殄滅我等游
牧終不得安即不能盡勦亦必追至葉爾羌喀什
噶爾布魯特等處方可結局於是公同商議齊奇
玉斯之額勒里蘇爾統等帶兵萬餘至吹地方鄂

爾圖玉斯之薩爾圖根巴圖爾等帶兵二千由阿克陶烏克陶起程約至克勒布拉克與哈巴木拜會合搶掠舍楞等俟春季雪消始回將所餘厄魯特在何處棲止知會大兵等語兆惠等現在軍營於賊衆情形何以全無信息今看伊等窮蹙已極勢必互相盜竊戕害是大兵未到哈薩克早已俘獲無遺而兆惠等尚以沙喇擘勒賊衆繁多頗有畏難之意可謂不諳事機矣又舍楞等或逃向特

穆爾圖淖爾及特克斯等處若距軍行遼遠即酌遣偏師前往搜捕以靖地方其哈薩克厄魯特交界處恐厄魯特殄滅後地多間曠哈薩克不免侵越雖游牧無人在我亦難盡守然必先知明疆界或哈薩克等向將軍大臣懇求轉奏朕亦可施恩賞給方與體制允協但不當聽其遽行侵越或輕易給與亦諭兆惠知之

命速送烏梁海安濟格斯奎於俄羅斯

上諭軍機大臣曰烏梁海安濟格斯奎曾掠俄羅斯
牧羣後經富德拏獲已命理藩院行文將二人送
往今據順德訥奏因大雪不能行走暫令帶回等
語現在俄羅斯以逆賊阿睦爾撒納出痘身死將
尸送驗外藩尚知守信則我大國檄送之人自不
便久羈著額爾克沙喇歸途之便將安濟格斯奎
帶至烏里雅蘇台轉交桑寨多爾濟速送俄羅斯
邊界其各傳諭知之

命副都統順德訥在雅爾哈善隊內行走所奏驍騎校頂帶寧古塔雅庫准其隨帶効力

壬子

以辦理逆賊阿睦爾撒納始末

宣諭王大臣等

上諭大學士曰今日王大臣等以俄羅斯獻出叛賊阿睦爾撒納身尸準噶爾大功告竣具表奏賀試問王大臣等此奏果皆實以為然耶抑或尚有以

叛賊之死為未可深信者耶在諸臣之或信或不
信本亦不足深論然朕之宵旰憂勤將以為邊圉
久遠之計而庸懦無識者流或未免退有後言此
則不可不明切申諭耳即如阿睦爾撒納逃叛之
初朕方手勅諸將銳意追擒而盈廷之議頗有以
伊犁既已平定不必窮追為言者及其竄入俄羅
斯則更束手相視付之無可如何若惟恐朕之飭
索過嚴以致又啟邊釁無論俄羅斯一部向屬和

好彼此不許容留逃人以理言之固當向索而叛賊之奸詭狡詐既入俄羅斯豈能鬱鬱久居又必將為其所用以為哈薩克一帶之患從前屢降諭旨所謂叛賊一日不能成擒則西陲一日不能寧謐者正為此也是以上年諭理藩院行文俄羅斯有阿睦爾撒納在彼若能永遠拘禁即不送出亦可之語然俄羅斯既已收留叛賊必且撫而用之又豈肯永遠拘禁耶索之而不獻則其曲自在俄

羅斯興師問罪固屬事不容已然使竟不向索則
彼亦何肯將尸獻出可見駕馭外藩之道威德宜
於並用堂堂天朝豈有遷就隱忍苟且自安之理
至昨據努三奏稱德濟特攜阿睦爾撒納之後妻
投入俄羅斯境此則無關緊要留之俄羅斯不過
彼處多一養養之人耳若亦嚴行飭索必令縛送
是未免深求過當即朕亦難辭好武之名矣朕於
此事乘時酌理惟求協乎事機之至當從未設一

成見統計用兵以來既未多糜帑項亦未勞我民
力今逆尸已出伊犁久定哈薩克又輸誠內嚮西
陲綏靖上纘

皇祖

皇考未竟之鴻模稍可免衆人之浮議朕之願足矣安
可言賀且現在尚有葉爾羌等回部未經平定及
哈薩克錫喇等一二逆賊逃竄未獲雖易於經理
之事計日可以奏績然朕之日夜籌畫政不以事

將就緒而稍懈也因王大臣之奏爰以苦衷示之
叅贊大臣雅爾哈善等疏奏屯田事宜

雅爾哈善奏言臣等遵

旨酌議屯田事宜詢問額敏和卓之子素賚瑞伯克
托克托之子阿卜都賚等據稱闢展魯克察克
吐魯番除官兵及回人屯種外因水乏無可開
墾吐魯番西百餘里通哈喇沙爾托克三城可
得兵丁五百屯種之地水頗充足再哈喇沙爾

通庫車阿克蘇大路舊係厄魯特回人墾種約
需兵丁二千名以上海都河水甚足烏魯木齊
約兵丁一千名水亦足用等語語臣等擬於哈
喇沙爾派兵二千四百名烏魯木齊原派兵五
百名增派五百名托克三與關展魯克察克相
近量增兵五百名關展仍派兵四百名共需兵
四千三百名除現兵丁外已移咨黃廷桂桂於
奏派八千名內先派三千名攜帶牛具口糧前

赴魯克察克於三月前趨到計需籽種一千六百石有奇除動用闢展存貯之外移文巴里坤大臣速為運送奏入報

聞

癸丑

以回酋霍集占罪狀

宣諭回部各城

奉

天承運

卷四十九

皇帝勅諭葉爾羌喀什噶爾庫車阿克蘇和闐等城
之伯克回人等朕為天下共主罔有內外一體撫
綏無使失所前因準噶爾變亂自相戕害厄魯特
等俱不聊生不忍坐視興師平定伊犁擒獲達瓦
齊就其台吉宰桑等級分封錫爵普加恩賚方冀
守分安居永享遐福無如厄魯特豺狼成性陰險
狡詐逆賊阿睦爾撒納負恩逃叛黨衆附和反覆

無常揆之天理國法斷不可逭因再行進剿以正
刑誅誠以凶頑不除則邊圉不靖不得已而出此
皆爾衆伯克回人所深知者至波羅泥都霍集占
兄弟在噶爾丹策零時被拘於巴阿噶斯哈丹鄂
拓克我兵初定伊犁釋其囚繫令為回人頭目方
欲加恩錫爵授以土田乃乘厄魯特變亂率伊犁
回人逃往葉爾羌喀什噶爾朕以其或懼厄魯特
騷擾暫避以圖休息尚未加兵第遣使招撫不料

竟敢戕害使臣僭稱巴圖爾汗情尤可惡若不擒獲正法則回衆終不得安生用是特發大兵聲罪致討但聞霍集占起意倡亂波羅泥都被迫從行已命分別辦理夫伊等以兄弟至親朕尚較其情罪輕重期無枉抑何況爾等回衆全無干涉豈有株連擾害之理惟是霍集占頗稱奸狡自知身犯重辟或圖苟延殘喘造言惑衆以厄魯特多被勦殺為比殊不思爾等皆無罪之人朕何忍與叛逆

之徒一體誅戮此次興師特為霍集占一人爾等
若將霍集占縛獻自必安居如舊永受殊恩如執
迷不悟聽從逆首指使大兵所至即不復分善惡
悉行剷除悔之何及尚其熟思利害毋自貽悞特

諭

諭叅贊大臣雅爾哈善等招撫回衆事宜

上諭軍機大臣曰今年進兵辦理回部罪在霍集占
一人與屬衆無涉已命兆惠雅爾哈善等宣諭招

撫但回人雖較厄魯特稍為安靜然在準噶爾數
世亦恐不免漸染習氣我兵招撫時必須詳為審
慎再行安插即如初定伊犁時回衆等業皆歸順
後因逆賊阿睦爾撒納中叛亦皆乘亂遁逃此皆
狃於撫馭未震軍威以致猖獗若此雅爾哈善等
此次進取回城須申明紀律使其知畏庶可潛消
反側而於安插亦易亦傳諭兆惠知之

命以欽差大臣關防暫給叅贊大臣雅爾哈善

上諭軍機大臣曰雅爾哈善奏稱辦理屯田進勦等
事文移往返必需印信請將巴里坤所有欽差大
臣關防賞給等語此次進兵以雅爾哈善為將軍
額敏和卓哈寧阿為叅贊大臣順德訥愛隆阿玉
素富為領隊大臣當特揀將軍印頒發欽差大臣
關防着暫行取用俟將軍印到日將關防留與永
貴定長辦理屯田事務其隨印辦事官員現諭兆
惠等酌派數人交與雅爾哈善併傳諭知之

申諭定邊將軍兆惠等協心進剿

上諭軍機大臣曰據兆惠奏稱奉到添派綠旗兵進
剿回部之旨候巴里坤口糧馬匹送到即往剿沙
喇拏勒賊衆再收取葉爾羌喀什噶爾等語昨兆
惠以沙喇拏勒聚賊萬戶似有畏難之意故令其
專辦厄魯特計此時尚未奉到諭旨然必知賊衆
尚易辦理故如此陳奏則從前之畏難益可見矣
去歲將軍成衮扎布等辦理無緒朕已分別示懲

兆惠等雖有微勞但巴雅爾乃偶值軍鋒哈薩克
亦久欲歸順究未能追及阿睦爾撒納是伊等本
無可自矜將來殄滅沙喇犛勒賊衆後能趲赴回
部更協事機若謂進兵既有分地不當分雅爾哈
善等之功則又屬推諉故習果能爭先奮勉何患
無成今命雅爾哈善為將軍其隨印辦事官員兆
惠等即於軍營內酌派數人發往

進勦扎哈沁之署叅領古爾特等

授職議叙有差

上諭軍機大臣曰兆惠等將進勦扎哈沁哈勒拜之
鄂實及所帶著有勞績之侍衛老格等五人又溫
布呈報搜勦臺站附近賊人之湍濟勒圖百慶額
列單具奏鄂實老格及陣亡得傷官兵已加恩陞
授優卹其委署叅領古爾特湍濟勒圖委署驍騎
校鄂勒都喀扎卜敦察愛申保委署防禦百慶額
俱著准其實授其溫布隊內陣亡得傷等官兵亦

著交部照例議叙議卹

命頭等侍衛努三哈薩克貿易事務

上諭軍機大臣曰兆惠等奏稱今秋哈薩克前來貿易順德訥熱習哈薩克等情形請令在烏魯木齊駐劄辦理貿易事務等語順德訥已派令進勦回部其哈薩克貿易事務著派努三辦理努三可仍遵前旨來京朕面詢彼處情形再行遣往諒秋季貿易之事自不致遲悞可傳諭兆惠雅爾哈善努

三等知之

命叅贊大臣哈寧阿巴祿管理巴里坤以外臺站

上諭軍機大臣曰從前伊犁奏事到京不過二十餘

日今烏魯木齊較伊犁甚近而亦需二十日未免

過於遲滯現在巴里坤以內臺站已派大員巡察

今大兵前進巴里坤以外臺站愈關緊要雅爾哈

善隊內著派哈寧阿專管兆惠隊內著派巴祿專

管

定邊將軍兆惠等疏奏查訊索倫遜坦脫出情形

兆惠奏言臣等遵

旨以索倫遜坦等於滿福被害後脫出恐有臨陣先
逃情節隨加訊問據稱滿福前行行令伊等看
守馱載忽遇賊被圍因無馬不能前進而叛賊
等已舉我軍大纛前來是滿福被害之時伊等
尚未知覺似無臨陣先逃之事奏入得

旨遜坦等酌量賞給錢糧仍効力行走

委署防禦奇泰以質訊擒獲之厄魯特美諾和
什來京

授為藍翎侍衛賞銀五十兩令在雅爾哈善隊內行
走

乙卯

命查審侍衛郭木尼勒圖收匿解送馬匹情罪

上諭軍機大臣曰據巴圖濟爾噶爾奏伊解送之馬

驚走七十三匹恐混入郭木尼勒圖馬羣詢其牧
羣章京喀勒占云多出馬數相合而郭木尼勒圖
堅稱無有却陰令分入兩牧羣又至蘇魯圖臺站
駐宿時查原議分隊馬羣須相隔稍遠且二隊不
可越過頭隊乃郭木尼勒圖是晚移駐將馬羣衝
入伊馬羣內以致俱被驚散次日收聚據稱倒斃
十匹查係伊馬印記者三匹餘馬惟餘頭蹄無憑
查驗等語巴圖濟爾噶爾頗知小心効力所奏自

屬實情且多出馬匹藏入兩羣之言俱係郭木尼
勒圖隊內章京自認則愈可為證郭木尼勒圖係
欽差侍衛不思有益公事反將他人逸馬收留又
故令驚散甚屬卑鄙狡詐著傳諭兆惠將郭木尼
勒圖革職查審如情罪確實即正法示衆巴圖濟
爾噶爾不能作字必伊隊內人等因被欺情急代
為繕摺具奏問之其人即可得知兆惠將來仍好
為差遣不可因伊係厄魯特人且將郭木尼勒圖

首告即行外視再上年吞圖布之死傳言未確并
著兆惠於進兵之便留心訪察

丙辰

以平定準噶爾及哈薩克歸降

諭布魯特部落人等

奉

天承運

皇帝勅諭布魯特部落頭目人等準噶爾自噶爾丹

策零身故以來互相殺害羣生不得寧居朕為天下共主罔有內外一體撫綏何忍坐視其亂用是特遣大兵平定伊犁擒獲達瓦齊安集衆厄魯特部落俾得其所乃準噶爾人等聽逆賊阿睦爾撒納之言反覆逃叛為大兵擊敗阿睦爾撒納逃入哈薩克我兵深入追襲哈薩克阿布賚拒戰大敗僅以身免始悔為逆賊所悞於上年遣使歸誠欲擒獻阿睦爾撒納逆賊知覺復逃入俄羅斯今已

出痘身死俄羅斯遣人送尸請驗在準噶爾人等
罪惡深重不得已始行勦滅以靖邊陲爾布魯特
本不與準噶爾相涉但舊為鄰國今準噶爾全部
平定則爾土地即與朕疆界毗連爾等若如哈薩
克慕化來歸朕將令照舊安居不易服色不授官
爵不責貢賦惟遣使來請朕安即加恩賞賚其或
爾等以外藩習氣與中國異宜不欲投誠降服亦
惟爾便但能約束所部永守邊界不生事端朕亦

不加兵騷擾倘爾等不安常分或越界游牧肆行盜竊則係自啟釁端斯時問罪興師爾悔將何及朕仁愛為心不惜開陳利害尚其熟思審處特諭諭定邊將軍兆惠等招撫布魯特事宜

上諭軍機大臣曰前據成衮扎布奏稱此次進剿沙喇擘勒再往辦回部或經由布魯特應諭令擒獻霍集占等語昨已命兆惠雅爾哈善等照成衮扎布所見傳諭今更繕發勅書諭以平定準噶爾及

哈薩克歸降等事令其守分安居兆惠等酌量頒
給此次進兵伊等如不必經過布魯特即另行取
道亦可何以總未奏及豈謂陳奏後即當另理攻
取耶布魯特以外部落尚多豈有盡行攻取之理
然伊等若驚疑生事又何可置之不問惟先期曉
示庶可潛消禍本再去年琿齊等叛逃正值兆惠
前赴伊犁之時迂道相避賊始得脫此次進剿不
可復蹈故轍

二月丁巳朔

訓諭定邊將軍兆惠等咨取順德訥兵丁

上諭軍機大臣曰吳達善等奏准兆惠咨稱順德訥
已派往魯克察克其所帶兵丁在軍營原派數內
伊至巴里坤時即交與侍衛瑞綽爾圖速赴軍營
等語近因順德訥由哈卜塔克拜塔克至巴里坤
前往軍營恐逾進勦之期諭令至巴里坤稍為休
息聽雅爾哈善調遣至兆惠此時即應起程猶固

執原派兵數候此數百人同進豈因朕召回成衮
扎布伊等無可推諉愈加恇怯惟冀增兵以自衛
耶現在軍營兵丁並非寡弱馬匹口糧均已陸續
起運且沙喇肇勒等逸賊復有何人為之接濟糧
馬何以畏難若此如必坐待青草發生始行前往
則賊衆亦因此得延喘息其力倍增矣為今之計
宜帶兵進發或緩行以養馬力不當再為駐候也
順德訥之兵仍遵前旨即業經起程亦速行追回

可傳諭兆惠雅爾哈善吳達善知之

已未

命以靖逆將軍印授雅爾哈善

上諭軍機大臣曰朕命雅爾哈善為將軍專辦回部
今授以靖逆將軍之印著派乾清門侍衛齊凌扎
卜賚送即留伊軍營効力行走

庚申

署定邊左副將軍納穆扎爾等疏奏烏梁海

貢賦戶口事宜

納穆扎爾奏言據喀爾喀郡王車木楚克扎布
報稱現同察達克等查勘烏梁海戶口其各得
秦有十餘戶二十餘戶不等者補授得木齊收
楞額等員未免繁冗請將戶少者兼併約四十
戶以上編為一得秦其進

貢貂皮戶口據察達克等告稱當以馬匹牲隻之
多寡為定否則年齒雖壯不敢呈報查實有馬

匹牲隻者七百十九戶年壯無力者二百二十
六戶老幼殘廢者一百二十三戶應分別著定
其總管噶拉拉克等戶口亦照此辦理再新經
歸附之鄂木布特楞古特三得泰無應授宰桑
之人請歸併察達克圖布慎等管轄又莽噶拉
克年幼時伊所屬九得泰曾作為三分同布珠
庫輝齊賚之兄等分管今布珠庫已死輝齊賚
年老現在戶口僅足五得泰之數請均歸莽噶

拉克管轄或仍令輝齊賚分管等語臣等伏查
車木楚克扎布熟悉烏梁海情形應其酌量
辦理奏入報

聞

辛酉

申諭靖逆將軍雅爾哈善等招撫回衆事宜

上諭軍機大臣曰據雅爾哈善等奏從前擒送達瓦
齊之伯克霍集斯仍在圖爾瑞辦事等語則霍集

占等不能脅服人衆可知矣我兵至彼伯克霍集斯等必來歸順然亦須留心訪察如上年成衮扎布等招降克勒特烏魯特等鄂拓克大兵既過隨後叛逃即其驗也雅爾哈善等進兵時如回人果能恭順歸降自當收恤令其頭目從軍餘人仍居本地其稍有抗拒者即宜剿殺以振軍威勿慮伊等前路驚疑稍事姑息蓋回人俱有城邑田廬非若厄魯特之易於驚竄也若既取庫車阿克蘇等城

亦應留兵彈壓玉素富為人誠實自必善守可於
二城內擇何處最要即令駐劄既可堅新附之心
亦資以聯絡臺站再圖爾瑞地名是否即係吐魯
番現在吐魯番為額敏和卓游牧今伯克霍集斯
所居圖爾瑞與何處相近在何地方著查明因便
奏聞

壬戌

諭靖逆將軍雅爾哈善等搜勦沙喇斯等賊衆

上諭軍機大臣曰據阿里衮等奏稱追勦沙喇斯瑪
呼斯賊衆入呼爾塔克山於塔喇圖烏沙克塔勒
兩處遇賊擒獲瑪呼斯得木齊額默根等據供因
大兵進勦巴圖爾烏巴什昂吉岱等不敢相投惟
藏於山林幽僻之處現在前往羅卜淖爾哈瑪爾
嶺等處搜捕等語昨雅爾哈善等奏據素賚瑞詢
問伊父額敏和卓遣來回人知阿里衮等追賊至
呼爾塔克勦殺瑪哈沁帶兵回程距吐魯番約五

百里因馬力疲乏兵多步行等語是伊等業已撤回其呼爾塔克等處距進勦回部之路相近雅爾哈善與額敏和卓應於此等地方留心搜捕或賊衆四有往投昂吉岱等游牧者亦著著兆惠嚴行搜捕其數多克哈什哈等尤當拏送來京毋致免脫

平定準噶爾方略正編卷四十九